

II - ARABAKO LURRALDE HISTORIKOAREN TOKI ADMINISTRAZIOA

ALEGRÍA-DULANTZIKO UDALA

Behin betiko onespena ematea autokarabanak eta etxebizitza ibilgailuak Alegría-Dulantzin berriaz atondutako aparkalekuan aparkatu eta gaua ematea arautzen duen udal ordenantzari

Udal honek, 2023ko abenduaren 13an egindako ohiko bilkuran, erabaki zuen behin betiko onespena ematea autokarabanak eta etxebizitza ibilgailuak Dulantzin berriaz atondutako aparkalekuan aparkatu eta gaua ematea arautzen duen udal ordenantzari.

Jendaurrean egon den bitartean erreklamazioak aurkeztu dira, eta onartu egin dira. Beraz, behin betiko onartutzat jo da, eta honela geratu da idatzita:

Autokarabanak eta etxebizitza ibilgailuak Alegría-Dulantzin berriaz atondutako aparkalekuan aparkatu eta gaua ematea arautzen duen udal ordenantza

Xedapen orokorrak

1. artikulua. Xedea

Ordenantza honek bi xede dauzka: batetik, Dulantzin, Udalaren kirol instalazioen ondoan, autokarabanak eta etxebizitza ibilgailuak aparkatzeko berriaz atondutako eremua nola erabili behar den arautzea, bertako natura baliabideak eta guneak babesteko eta pertsonen segurtasuna eta aparkaleku publikoak herri bideen erabiltzaile guztien artean modu ekitatiboan txandakatzea eta banatzea bermatzeko; bestetik, kanpaldi librearen debekua, araudi autonomikoan ezarritakoa, betearaztea.

2. artikulua. Kanpaldi librearen debekua

Zehapena ezarriko zaie Dulantziko udalerrian autokarabanetarako gordetako aparkalekuan kanpaldi librearen debekua hausten dutenei. Ondorengo artikuluetan zehazten da zein den kanpaldi librearen eta autokarabana aparkatzearen arteko desberdintasuna.

3. artikulua. Kanpaldi librea

Hau da kanpaldi librea:

- Autokarabanatik kanpo aisialdirako gauza edo tresna bat jartzea, baita erraz garraiatzeko moduko elementuren bat, zimendurik ez daukana, erabiltzea ere.
- Autokarabana ordenantza honetan ezartzen dena baino luzeago egotea aparkalekuan.
- Dulantziko Udalaren langileen edo Ertzaintzaren iritziz Udalaren beste ordenantzetan ezartzen denarekin bat ez datozen jarduera guztiak.

4. artikulua. Aparkatzea eta kanpatzea: desberdintasunak

Autokarabana eta antzeko ibilgailuei baimena ematen zaie hiri barruko bideetan geratu eta aparkatzeko, baldin eta geratze edo aparkatze hori arriskutsua ez bada, legeak xedatutakoaren arabera egiten bada, zirkulaziorako eragozpen edo arriskurik sortzen ez badu eta geratu edo aparkatzeko baimendutako tokian adierazi bezala jartzen bada ibilgailua. Kontua azaldu eta argitzearren, honako kasu hauetan autokarabana ez dago kanpatuta, baizik eta aparkatuta:

- Zorua gurpilek edo segurtasun altxagarriek bakarrik ukitzen dute (hanka egonkortzaileak ez daude eraitsita, ez eta bestelako tramankulurik ere).

2. Autokarabanak itxita dagoela okupatzen duen eremua baino ez da okupatzen; hau da, leihoak itxita daude (irekita edo kanpora zabalduta dauden leihoek ibilgailuaren perimetroaz harago dagoen eremua okupatzen dute) eta ez dago aulkirik, ez mahairik, ez olanarik hedatuta, besteak beste.

3. Ez da isurtzen inolako fluidorik, ez kutsagarrikerik, ez bestelakorik; salbuespenak: motorraren errekuntzak sortu eta ihes hodiaren bitartez kanporatzen direnak; gizalegez jokatzeko ez denean edota jarduera osasungaitzen bat egiten denean (bide publikoan ura hustea, esaterako) sortzen direnak. Ez da zarata gogaikarrikerik egiten (adibidez, elektrizitate sorgailu bat martxan jartzea) eta ekipamendu akustikoen bolumen ez da handiegia herritarrek atseden hartu ohi duten orduetan edo egunez aldi luzeetan.

5. artikulua. Aparkaldia

Ibilgailu hauek gehienez 72 ordu egon daitezke aparkatuta toki berean; hala ere, badago salbuespen bat: Dulantziko zaindariaren jaietan 96 ordu egon daitezke aparkatuta. Udalak, gainera, autokarabanak bide publikoko eremu mugatueta aparkatzea mugatu edo debekatu ahal izango du, bide segurtasunari edo zirkulazio eta aparkaleku espazioari eragiten dioten etxebizitza ibilgailuen baimendutako gehieneko tamainak edo masak eragindako arrazoi objektiboengatik. Tasa bat ezarriko da urak aldatzeko zerbitzuagatik.

6. artikulua. Zerbitzuguneak

Hauek dira Dulantziko autokarabanen zerbitzugunea erabiltzeko arauak:

1. Ibilgailuen sailkapena:

Ordenantza hau autokarabana eta etxebizitza ibilgailu homologatu hauei aplikatzen zaie:

- 2448 (etxebizitza furgonia).
- 3148 (etxebizitza ibilgailu mistoa).
- 3200 (autokarabana, zehaztu gabea, baimendutako gehieneko masa 3.500 kg-tiko gorakoa ez duena).
- 3248 (etxebizitza autokarabana, baimendutako gehieneko masa 3.500 kg-tiko gorakoa ez duena).
- 3300 (autokarabana, zehaztu gabea, baimendutako gehieneko masa 3.500 kg-tik gorakoa duena).
- 3348 (etxebizitza autokarabana, baimendutako gehieneko masa 3.500 kg-tik gorakoa duena).
- 4048 (etxebizitza atoi eta erdi atoi arina, 750 kg-ko edo gutxiagoko gehieneko masa baimendua duena).
- 4148 (750 kg-tik beherako etxebizitza atoi eta erdi atoa, 3.500 kg-ko edo gutxiagoko gehieneko masa baimendua duena).
- 4248 (3.500 kg-tik gorako etxebizitza atoi eta erdi atoa, 10.000 kg-ko edo gutxiagoko gehieneko masa baimendua duena).

2. Erreserbatutako zonetan etxebizitza gisa katalogatutako ibilgailuak bakarrik aparkatu ahal dira. Bestelako ibilgailuak, adibidez kamioiak, turismoak, eta abar, ez badira etxebizitza gisa homologatu eta ez badaukate komunik eta erabilitako urak biltzeko biltzerik, ezin dira aparkatu.

3. Aparkatutako ibilgailuek uneoro errespetatu behar dituzte zorian aparkatzeko marraztu diren espazioen mugak. Ezin dute kanpora mahairik, aulkirik, olanarik, eguzkitakorik, estalkirik edo bestelakorik atera.

4. Gehienez 72 ordu egon daitezke bertan, ibilgailua geratzen denetik plaza uzten den arte. Ezinbestekoetan edo beharrezana dagoenean bakarrik, eta alkateak alde zuzenetik baimentzen badu, gainditu ahal izango da egonaldiaren gehieneko iraupena.

5. Autokarabane eta antzeko ibilgailuek sortzen dituzten ur gris eta beltzak husteko espazio bat edukiko dute erabiltzaileek. Gainera, tratatu gabeko uraren hargune bat edukiko dute. Zona honetan ezin da aparkatu. Erabiltzaileek erabiltzeko da, eta erabili ondoren garbitu egin beharko dute, eta berariaz debekatzen da edozein motatako ibilgailuak garbitzea.

6. Autokarabanak udalaren jabetzako zerbitzugune eta birziklatze guneetan sartu eta han eskaintzen diren zerbitzuak erabiltzeagatik ordaindu beharreko prezio publikoa, bestalde, ordenantza honen tarifen eranskinean dago jasota.

Ur grisak eta beltzak husteko autokarabanen aparkalekuan sartzegatik prezio publikoa 1,5 euro izango da, eta 30 minutu izango dira horretarako. Egiteko hori betetzeko denbora amaitutakoan, erabiltzaileak 1,5 euro ordaindu beharko ditu gehiegizko 30 minutuko.

Elektrizitatearen erabileraren prezio publikoa honako hau izango da: euro 1/ordu 1, 2 euro/2 ordu, 3 euro/3 ordu, 4 euro/4 ordu, 5 euro/5 ordu, 6 euro/24 ordu.

Eranskina

Tarifak:

3,00 euro/eguna.

1,5 euro/30 minutu urak husteko.

Elektrizitatearen tarifak:

Ordu 1: euro 1.

2 ordu: 2,00 euro.

3 ordu: 3,00 euro.

4 ordu: 4,00 euro.

5 ordu: 5,00 euro.

6 ordu: 6,00 euro.

7. Udalak edo Ertzaintzak zerbitzugunea zaindu eta jagoteko eta elkar errespetatzeko eta gizalegez jokatzeko ematen dituzten jarraibide guztiak beteko dituzte zerbitzuguneetako erabiltzaileek. Era berean, udalak edozein unetan erabil ditzake zerbitzuguneetako eremuak beste erabilera batzuetarako. Horrek ez du kalte ordainik sorraraziko zerbitzuguneen erabiltzaileentzat.

8. Debehatuta dago bide publikoan, eta bereziki autokarabanak aparkatzeko plazetan, kanpatzeko trasteak jartzea, hala nola mahaiak, aulkiak edo estalkiak, salbu eta berariaz baimentzen diren lekuetan.

9. Udalak udalerrian horrelako espazioak jartzea sustatu ahal izango du. Horrelakoak jabetza publiko nahiz pribatuak izan ahal dira. Edonola ere, erabilera publikokoak izango dira beti.

10. Udalaren instalazioen erabilera eta aprobetxamendu publikoa ahalik eta onenak izan daitezen, autokarabanen zerbitzugunearen erabiltzaile guztiak udalari jakinarazi beharko dizkiote gertatzen diren arazo tekniko, matxura, narriadura, gabezia edo erabilera desegoki guztiak.

11. Zerbitzugunearen barruan, kategoria guztietako ibilgailuen gehieneko abiadura 30 km/h izango da. Betiere, ibilgailuek ezin dute zaratarik egin bat-batean azeleratuz, eraldatutako ihes hodian bidez edo bestelako inguruabar ez-normalengatik. Gainera, ezin dituzte gainditu udal ordenantzek edo aplikatu beharreko legeriak finkatutako zaraten eta gas emisioen mugak, egotekotan.

7. artikulua. Ikuskatzea

Ordenantza honetako edozein artikuluren, edo ordenantza garatzeko Alkatezak ematen dituen xedapenen, kontra egitea edo horiek ez betetzea arau haustea izango da; orduan toki korporazio honi egokituko zaio ikuskapen eta zehapen funtzio egokiak betetzea. Udaleko zerbitzu aniztetako langileak izango dira ordenantza hau betetzen dela zaindu behar duten pertsonak.

8. artikulua. Eskumena eta zehatzeko prozedura

1. Zehapen prozedura hasteko eta ebazteko eskumena duen organoa Dulantziko Udaleko alkatea, edo hark eskuordetzen duen pertsona, izango da.

2. Zehapen prozedura Zehatzeko Ahala Gauzatzeko Araudia onesten duen abuztuaren 4ko 1398/1993 Errege Dekretuak ezarritakoaren arabera gauzatuko da.

3. Espedientearen ebazpena gehienez ere urtebeteko epean jakinarazi beharko da, prozedura hasten denetik aurrera zenbatuta, eta interesdunak planteatutako kontu guztiak eta prozeduratik eratortzen direnak erabakiko ditu.

Prozedura hasten denetik urtebeteko epean ez bada zehapen ebazpena jakinarazten, prozedura iraungi egingo da eta jarduketak artxibatuko dira, interesdunak eskatuta, edo bestela, ebazpena emateko eskumena daukan organoak egingo du, ofizioz, salbu eta prozedura eteteko arrazoia interesdunei egotzi behar bazaie edo epaile baten jardunaren ondorio bada.

9. artikulua. Arau hausteak eta zehapenak

1. Ordenantza arautzaile honen 3. artikuluan xedatutakoa urratuz autokarabanak aparkatzea arau hauste arina da, eta 90 euroko isunaz zehatzen da, baldin eta arau hauste horrek ez badakar bide publikoa oztopatzea.

2. Ordenantza arautzaile honen 4. artikuluan xedatutakoa urratuz autokarabanak aparkatzea arau hauste larria da, eta 300 euroko isunaz zehatzen da, baldin eta arau hauste horrek bide publikoa oztopatzea badakar.

3. Arau hauste larria izango da 5. artikuluan ezarritako debekua urratuz aparkatzea, eta 300,00 euroko isunaz zehatuko da.

4. Kanpatze librearen debekua urratzea arau hauste larria izango da eta 300 euroko isunaz zehatuko da. Isuna 450,00 eurorainokoa izan ahalko da, jarduera hori eginez hiri altzariak narriatzen badira edo kanpatu den zona, axolagabekeriaz, zikintzen bada; horrez gainera, egindako kalteak konpontzera behartuta egongo da kaltearen egilea. Isuna aipatutako neurrian handituko da, halaber, barbakoak edo antzekoak jartzen badira, ingurunea kaltetu edo arriskuan jartzen baitute.

10. artikulua. Kautelazko neurriak

Arau hautsi duen ibilgailua ibilgetu edo bide publikotik kenduko da indarreko legedian ezarritako kasuetan. Arau hauste baten ondoren arau hausleak ez badu frogatzen espainiar lurraldean non daukan ohiko bizilekua, isunaren zenbatekoa behin-behinean finkatuko du salatzaileak. Zenbateko hori ez bada ordaintzen edo haren ordainketa ez bada bermatzen zuzenbideak onartzen duen moduetako edozeinetan, ibilgailua ibilgetuko da.

11. artikulua. Erantzukizuna

Dulantziko autokarabanen aparkatze gunea ez da zaindutako eremua. Beraz, Dulantziko Udalak ez du erantzukizunik hartuko aparkatutako autokarabanetan gorabeherarik, lapurretarik edo antzekorik gertatzen bada.

Lege honetan xedatutakoa urratzearen erantzukizuna arau haustea egiten duenarena izango da zuzenean.

Arau haustea egiten duen ibilgailuaren jabeak edo errentariak, behar bezala agintzen zaionean, arau haustearen erantzulea den gidaria modu sinesgarrian identifikatu beharko du. Betebehar hori betetzen ez badu, prozedura izapide egokian, 300,00 euroko isuna ezarriko zaio, arau hauste larri baten egile gisa.

12. artikulua Autokarabanisten betebeharrak

Ordenantza honetan ezarritakoa bete beharraz gainera, autokarabanistek betebeharrak hauek izango dituzte:

1. Mugimendu autokarabanistak estatuetako eta Europako elkarten bidez finkatutako jokabide eta etika kodeak errespetatzea, eta natura eta ingurumena zaintzea, bide publikoaren gainerako erabiltzaileak errespetatzea eta, oro har, kontzejuko biztanle eta bisitari guztiak.

2. Trafikoko eta bide segurtasuneko arauak betez gidatzea, ahal den neurrian gainerako gidariei aurreratzea eta maniobrak egitea erraztuz.

3. Edozein motatako zarata gogaikaririk ez egitea, batez ere soinu aparatu, irrati, telebista, energia sorgailu edo etxeko animalienak, hiriko bide publikoan edo horretarako egokitutako zonetan aparkatuta egon bitartean.

4. Hiri hondakin solidoak biltzeko ontzi egokiak eta hondakin urak biltzeko ekipamendu egokiak erabiltzea.

5. Aparkatzeko espazio fisikoa okupatzea, beharrezkoak diren mugen barruan.

6. Aparkatzerakoan eragozpen funtzionalik ez sortzea, motordun ibilgailuen nahiz oinezkoen trafikoaren segurtasuna arriskuan ez jartzea, monumentuen ikuspegia ez oztopatzea, eta eraikin publiko edo pribatuen eta establezimendu komertzialen sarbideak ez oztopatzea.

Azken xedapena

Ordenantza hau ALHAOn argitaratu eta hurrengo egunean jarriko da indarrean.

Guztiak jakin dezaten argitaratzen da.

Alegrá-Dulantzi, 2024ko apirilaren 9a

Alkatea

JOSEBA KOLDO GARITAGOITIA ODRIA